


Marlon Croes, director: DOW a evoluciona den 90 aña di existencia

Trabao ariba su mes ta hopi mescos cu e retonan financiero pa por cumpli cu e demanda di comunidad



ORANJESTAD (AAN): DOW ta un di e prome institucionnan cu Aruba tin. E departamento aki tin 90 aña y el a cuminsa y den transcurso di e añanan varios cambio a tuma lugar. For di DOW a sali Kadaster, Domein Beheer, Serlimar, VROM cual hunto cu Domein Beheer a bira DIP.Ing. Marlon Croes, director di DOW a duna di conoce cu tin hopi demanda cu comunidad tabata rekeri den e ultimo añanan cu e consecucionan cu mester

adapta e organizacion pa por cumpli cu e demanda di e comunidad. A agrega cu 35 aña pasa, DOW tabata consisti di 700 hende y compara cu awe, nan ta rond di 215 hende. Den transcurso di aña 97, pa awor, a reorganiza DOW y den esaki nan a saca afo cierto tareanan cu no tabata cay bao di DOW mas, por ehempel garashi y nan a drenta den un 'lease' di auto di D-wagen pa asina tene nan D-wagen constantemente na un nivel cu tur hende por traha, Croes



a indica.

Tambe DOW den su forma original a evoluciona. A haya mas trabao acerca den e sentido di mas parke, mas areanan di recreacion y tur esakinan mester wordo mantene. Esey ta trabao adicional cu a bin banda di e trabaoan di mantencion di riolering, carretera, borchis, duikers, bouwvergunning, etc. Banda di esey, DOW tambe a crece teniendo cuenta cu e cantidad di contratistanan chikito cu ta traha cu nan. Tin 137 contratista chikito, cada un di tres hende y nan ta haci e trabao di manten-

cion rond di nos isla, Marlon Croes a señala. Pa loke ta presupuesto, a agrega, esaki a baha y a keda mantene na e mesun nivel y mas trabao a bin acerca. A bisa cu nan tin cu pensa hopi creativo con por haci e procesonan mas eficiente, pa cu e placa ey por haci e mesun trabao y cu e placa cu resta sigui haci otro tareanan. Esey ta e reto di mas grandi cu DOW tin aworaki, pa cu e tiki placa cu tin y cu tin cu haci mas hopi cune.

E director di DOW a indica cu tin aspectonan cu ta bay sufrir. Un di nan ta nan planta di purificacion. Den 2015, 2016 a hinca casi 2 milyon florin den e planta pa tene nan draai, pero ta ekiponan cu ta draai 24/7.

A ripara cu e calidad di e mantencion ta bayendo atras. Consecuentemente, recien a haci un evaluacion di tur e plantanan y di kico mester pa tene nan den funcion den un manera responsabel.

Croes a bisa cu esey ta e retonan grandi cu DOW tin aworaki y di otro banda ta e programa cu tin hunto cu minister di asfalta diferente caminda rond di Aruba, cual tin un demanda masha grandi.

Un otro parti cu comunidad ta pidi ta verkeersplateau pa regula e velocidad di e autonan den e barionan y rond di scolnan. Esey tambe ta un programa cu tin andando y cu ta wordo ehecuto di awor te cu fin di aña, a laga sa.

E trabao ariba su mes ta hopi y e retonan financiero pa por realiza cu e tiki placa mas hopi trabao pa cumpli cu e demanda di comunidad ta grandi.

Marlon Croes a agrega cu comunidad di Aruba ta hopi critico. "Cada caminda cu nos cera of habri tin critica ariba dje". E criticanan ta hopi compara cu 35 aña pasa pero DOW ta uza e criticanan aki den un forma constructivo, a remarca.